

BANWAKLUZ.com ta contribui cu e desaroyo di talento di hobennan creativo

BANWAKLUZ.COM ta un proyecto di promocion cultural cu a cuminsa na 2010. E proyecto ta activo durante temporada di fin di aña y ta consisti di un website completo cu un kalender di actividad social, un ruta di luz cu adresnan di lugha bunita decora rond di nos isla, hopi potret, musica y informacion di nos celebracion di Pasco y Aña Nobo na Aruba. E slogan di BANWAKLUZ.com ta “E website cu tur ambiente di fin di aña” y diadomingo awor, dia 4 di November 2012, BANWAKLUZ.com ta lansa su online radio show den colaboracion cu Youthfever.com na e Christmas Town Expo. Ta importante pa menciona cu BANWAKLUZ.com

ta un proyecto non-profit.

Recientemente BANWAKLUZ.com a uni cu Expedicion Rescate y a lansa un pagina nobo riba e website cu ta completamente dedica na nos cultura. Riba e pagina aki lo haya informacion di Expedicion Rescate, cual ta un proyecto cu ta investiga e herencia cultural di nos celebracion di Fin di Aña. BANWAKLUZ.com ta hopi contento cu e colaboracion cu Expedicion Rescate, paso pa medio di nan investigacion Aruba lo haya sa mas di e historia cultural tras di nos celebracion di fin di aña. E topico cu Expedicion Rescate ta investiga e aña aki ta nos musica di fin di aña, en particular

Dande.

BANWAKLUZ.com ta brinda talentonan local (ambos musical y di otro disciplina artistico) un lugha y oportunidad pa nan por comparti nan talento cu e publico. Riba e website tin un pagina di Artista na unda bishitantenan di e website por haya e number di contacto y informacion di diferente agrupacionnan musical y artista local. Tur artista y grupo di musica local por promove nan actividad y produccion di fin di aña riba BANWAKLUZ.com gratuitamente! Esaki ta conta pa organisacionnan non-comercial manera fundacionnan y scolnan cu ta organisa evento di Pasco

tambe. Simplemente manda informacion di e actividad na banwakluz@gmail.com y e ta wordo publica riba e website. Banda di promove nos cultura y tradicionnan riba BANWAKLUZ.com, e proyecto aki ta un proyecto di desaroyo creativo pa hobennan. Gran parti di e contenido di e website, manera e potretnan, videonan, e graphic designs, e programa di radio y otro media ta wordo produci door di hobennan entre 15 – 21 aña di edad. E hobennan aki ta ricibi guia y training di profesionalnan den media produccion y ta asina BANWAKLUZ.com ta fungi manera un “stageplek” pa e hobennan yen di talento aki.

BANWAKLUZ.com lo ta presente na e Christmas Town Expo e fin di siman aki, dia 2, 3 y 4 di November na Renaissance Convention Center. Un y tur ta keda cordialmente invita pa pasa na Booth # 4 pa cera conoci cu e team di BANWAKLUZ.com y haya sa mas di e proyecto Expedicion Rescate. Lo tin hopi oportunidad pa gana premionan fabuloso na e booth di BANWAKLUZ.com, manera kerstboom di Kerstboomlandia, Hershey’s Candy Baskets, un flatscreen TV, iPad Mini y iPod Nano. Mientras tanto, bishita e website www.banwakluz.com of busca Ban Wak Luz riba Facebook.